

UT NOEWE PRINSEP AAR...



Beste Dörpsgenote,

Wae, Prins Len I en Prinses Maud, hubbe de ieër om in 2013 de ker te moge trekke in de Vastelaovendj van Haler. Doa zeen wae erg bliej met, en wae zulle uch den auch neet terleur gaon stelle; ut daak geit deraaf!

Wae dinke den auch (in alle besjeienheid) det de Vastelaovesvereniging ein wies besloet haet genome, om os as Prins en Prinses te vraoge. Ut Vastelaovendj veere zit os namelik in ut blood.

Al van jongs af aan zeen wae met pap en mam met gegange. De bewieze daovan kintj gae zeen op de foto's op dees pagina. En waat os geveul veur humor betreftj: ein hieël aoje en wieze mins dae hieël veul van wiskunde haet geweite, haaj ein slumme raekenregel bedachtj: "min maol min is plus". Omdat os pap en mam allebei gein geveul veur humor

hubbe (min maol min) zitj det bieje os waal good!

Dus wae gaon der van oet det:

- Ut in 2013 ein boetegewoean gooje Vastelaovendj geit waere
- Wae dao ein hieël groeate biedrage aan gaon levere
- Eederein dao net zoeaveul zin in haet as wae
- Ut knoepe-druk waerdj op os Prinsereceptie op 20 jannewari
- Ut knoepe druk waerdj oppe Bontje Aovendj op 2 fibberwari
- Wae met de bein boete hange op Dolle Dinsdig
- Wae dees ker gaon trekke onger os motto:



**Nao de sjoel kinne wae fluite
Mer met de Vastelaovendj zeen wae
neet te stuite**

**Haler
Alaaf!**